

七

錄

齋

文

鈔

藏書

書籍之傳變乎尚矣其上者足以明道法而述治統其次事蹟之紀載論議之環奇物名之證據文章之爾雅耳濡目染皆足有裨身心發為詞翰不懈而及於古矣若其篇目之流傳足資考鑑斯亦汲古者所當有事也方今

聖天子稽古右文內府清秘之儲蒐羅詳備照耀藝林而

執事以柱史蘭臺所藏殷殷下詢深有望於好學深思之士甚盛心也生之忝鄙得一忘十敢率其愚以對按

七錄齋文鈔

周官外史掌三皇五帝之書即左史倚相所謂三墳五
典而八索即八卦九邱則九州之志乘也然皆荒誕而
不可信故孔子得帝鴻氏之書千有餘篇而刪之自唐
虞始孔子所弗述即及門所弗道也宋羅泌之路史劉
恕之外紀大抵取之内外傳史記及諸緯書務其奇博
頗多可採然其荒誕者亦未易更僕數耳夫上古之事
在孔子之時已荒畧失傳史遷謂為其文不雅馴是也
况經秦火之餘漢儒掇拾煨燼識者譏之宋之距漢又
越千年後而欲網羅軼事不誠難哉且夫秦漢間固書
籍一大升降之會也武帝耽玩文史稍購圖籍成帝遣

言者陳農徧求遺書貯之天祿命劉向楊雄校之向子歆編成七畧七篇班氏藝文志悉取之迨後漢之書籍盡忘於建安之時曹氏父子並擅詞翰多蓄異書而以甲乙景丁為標識後人因之為四部書自然其時未分經史子集自晉阮孝緒始以集名而唐宋之書無不名集而以經史子集分部矣若孝緒之七錄王儉之七志則仿漢之七畧而為唐宋書目之先型也然書籍之傳自唐以前多係寫本精心手校珍愛之至彌極鑽研唐之末已有雕本猶未甚廣至五代長樂老鏤板五經行之其功固不可沒然得之易而不甚愛惜探索不精實

七錄齋文鈔

學由之而寡矣夫生後世而得脩覽前古之遺蹟誠學者之幸事也而其篇目之詳備則必盡讀羣書而後得識其大畧自錄畧諸書外隋之經籍志實兼五代之圖書唐之藝文志出自歐陽一手論者謂不減晉中興簿外此則一家之書亦有足採如馬氏之經籍考多本之晁氏按籍而稽如數家珍寶遠出鄭樵之藝文畧蓋夾漈逞其私智將著書之姓氏悉行刪削明胡應麟譏其一書兩見甚之割裂書名誠有所不免也然則卽馬考鄭略校其優劣列其異同而徧讀各史之志無有遺焉

將大雅之林哉

戴藻王八十壽序

淮陰去桐山千里而聲問時相

陽戴氏並得往來於鉢山袁浦

間道系才清于同

清芬相尚氣誼彌篤歲時子弟從過江干不以道路阻
洽契之情數十年如一日也予宦遊都門於戚友慶祝
之禮蓋久多踈畧自歸田後始漸問親族之耆舊已落
落如晨星今年春藻王嗣君名彪昆李從淮上寓書來
稱其尊公年晉八秩至戚中唯予年為稍長而知其生
平之梗概者亦惟予為最悉微諸嗣君之請予豈能已
於言耶昔嘗讀范史王烈傳烈少以行義稱鄉里人多

化為善人宋史稱明道先生居鄉人獻其誠致其恭未嘗不流連慨慕想見其人以為古之風俗淳厚猶賴賢人君子為之樹儀型而端軌範迨教衰俗敝士大夫遂不復以名節自勵其或有矯然自異不隨世骯骯者或反目為迂遠不近乎人情其由來非朝夕矣而以予所見聞唯翁則卓然不群者也翁自少時即擅譽文園制行之潔立身之高軼塵壒而滌泥滓若無意人世事者而人倫推為楷模子弟奉為矜式邦之大夫式廬而擁篲四方過從之士請業而執經迨至年彌高德彌卽德行堅定強立不返設使

聖朝修辟雍之典有事三老五更以君當之有以進俗
習於敦龐睹太和之氣象不僅如王彥方明道先生而
已也予於翁孔李之誼兼以累世姻盟情好日篤是叨
餘暉而藉庇廕者正未有艾雖以山川之阻有缺登堂
獻竿之禮而遙念賓筵介祉萊舞承歡吾文雖陋為翁
諷之以佐一卮知非世俗之諛詞比也由是登期頤之
上壽追松喬之高風揚休王庭歌詠流傳豈徒稱歲佳
陰已哉

周松軒侍御暨配陳恭人五十雙壽序

乾隆歲次丁未為吾友周侍御松軒先生暨淑配陳恭人五十雙壽之辰同朝寅雅及日下戚友將製錦以申祝而予以予與松軒交相善且最久素悉其世德家法及其植身居官之大節相屬為序噫輦下才人學士鴻筆林立特采迂陋之詞以侑賓筵之觴其諸異乎世俗之為壽者歟大興周氏為京師詩禮舊族太翁裕菴公一生績學敦行衣冠古處儼然人師偕李太君勤儉持家篤婣婣樂施予至老勿倦六黨矜式無間言松軒幼承庭訓言動必準繩墨潛心經義出而合轍辛壬間聯登

三榜

簡命刑曹時大吏任事勤覈說堂畫諾必面詰詳究諸
曹多高才生皆捷給爭勝松軒以書生初入粉署私念
讀書讀律理無二致一編低首字析句剖務求精義以
漸得其所以然之故遇鞫案心平望審期兩造各輸其
誠雖卷宗山積必次第循校不遺一字治事既有聲遂
總閱秋讞雪堂尤羣材會聚議論往往不一松軒心平
力定不以人言為向背謹守舊章不假寬縱以示仁不
務搜剔以示察每當同儕高議風生酣嬉調譴才辯鋒
發松軒獨危坐斂身不置一語及遇大案有關出入堂

上然疑不決或長官所見齟齬他人方箝口裹足或依違兩可以為得計松軒獨堅持所見無唯阿終不可即退而上書洋洋數千言反覆條辦理足而詞達上官覽之翻然樂從其說敬禮有加予與松軒兩度同曹又同司獄典凡研相接者前後凡十載故相知之獨深也比年以來才益老後進之士爭相請益松軒曰審案以速結為第一義多逮一人即多擾一家噫此即明慎不留獄之經旨松軒讀書學道躬行寔踐於此益信矣客冬擢授臺垣予方為臺中賀得人而松軒自謂稱職維難兢兢將事益用歛然松軒先世舊居近市壬辰後兩燬

于火家室蕩然松軒矢志在公不為家人生產計而登
其堂雍雍肅肅內外整潔慈幃甘旨之奉群從婚嫁之
需應時措置同人訝其搢何術以致此迨相處既久乃
知陳恭人內助之力為獨多松軒早年屢困棘闥足不
窺園恭人篝鐙佐讀善事翁姑曲盡婦職初不以家務
稍分讀書志迨松軒釋褐服官恭人以一身摒擋內外
自喪葬婚嫁數大事及米鹽瑣屑皆躬節儉謹蓋歲初
不以一事貽夫子內顧憂雖中饋為婦職之常然當家
道中落而未雨綢繆有烈丈夫所難為者蓋一則黽勉
在公一則楮柱間內各盡其職正交擅其美也今者設

悅懸弧之慶酒晉賓筵瑞符靈策欣歲月之方長正不
必誦岡陵而稱眉壽也頌君子之偕老象服攸宜記畫
錦之初開某衣環侍令嗣蜚聲庠序幼亦詩禮咸聞膝
下守詩書之教澤門庭無嘻噏之風德為福基善無不
報龍章鳳誥疊受

恩綸極一堂歡娛和樂之情即以申九棘拜手稱觴之
慶又奚取揚芳摘藻之鋪張乎哉是為序

尉氏令周玉圃壽序

桂陽周君玉圃以湘中名孝廉出宰豫之尉氏三年邑
大治百廢具舉閭閻安其業而頌聲交作歲己亥為君
五十壽辰時方有事于河防士民走工次謀躋堂獻觥
君靳弗許逾年大功告成安瀾有慶上慰

宵旰下貽樂利于是邑之父老暨門下士謀所以為壽
而乞予一言以侑觴予何敢以不文辭君生有異稟甫
孩稚嶄然露頭角贈翁絕愛憐之作詩有即弱已超衆
縱狂不類痴之句出就外傳讀書日教行下師友以大
器相推性孝友椿萱早謝霜露愴懷每值歲時享祀盡

禮盡誠風樹之悲數十年如一日昆季四人仲叔先即
世撫遺孤飲食教誨無異己子伯氏艱嗣以次子為之
後布被綢繆老而彌篤己卯登賢書不數歲以大令

簡發中州丙申補尉氏令尉當南北之衝車書旁午力

役無休君下車惻然悉心調劑設法減除民力大舒擅

聽斷才不拘拘于堂告會期遇事至輒予剖決不事搏

擊鈎致而燭照如觀火敏給如流水案無留牘故民無

停待候質之累會歲大旱君齋宿祈禱逾日而甘霖沛

民頌如神邑無書院士子少所董勸于是公餘召諸生

至後堂口講指畫授以讀本不啻鄉先生之訓子若弟

者漸摩既久文風蒸然日上兩校秋闈所錄皆知名士
戊戌河決考城捷竹塞焚久未塞奉大府檄督河工露
宿河干者累月竭蹶急公橐無餘資不以纖毫累閭里
力請兩臺放歸河夫七百餘名民間省雇費鉅萬工畢
回邑邑之父老子弟相與持絳蓋錦衣奉辦香歡迎境
外叩首馬前歌呼之聲歡騰遍野豈不休哉予觀前代
循吏治績如鞭蒲騎竹獄無寃民慕羅賢士以及甘雨
隨車道遮馬首一節著長史氏輒贊嘆艷稱之為千古
守令之芳規君乃克擅衆美直兼古循吏之盛寧不為
此邦之幸而增

國史之光歟淑配孺人綺歲于歸徽音懋著自芸窓
佐讀以至宦閣鳴機凡諸德政閭閻以內寔贊襄之可謂
賢已抑予聞治術根諸道化而偉人鍾于地靈五岳之
秀推南衡九江既涯為洞庭維楚有材毓為人傑況自
七先生之講學兩刺史之倡教遺徽未杳而所稱道南
正貽尤推濂溪先生其南安政績寔開晉城南康之先
路桂楊與道州俱在衡山之南鍾川嶽之靈淑溯儒學
之淵源其生非偶其學有自則所謂湘中琳瑯者君當
之無愧色焉夫仁為壽之卒乃福之基他日政茂龔黃
仰邀

盟詔坦步雲霄而齊眉髮髻詎可以量乎哉

王果亭八十壽序

昔歲丁丑果亭先生慶七旬曾採予言以侑觴今又十年矣先生雪鬢蒼顏優游林下而令子次典振起繼家聲官吳陵因公過里門復丐余文以製錦予惟先生幹才偉績碩德清風久已彪炳大江南北人皆耳熟聞之即近今解組歸田楷模後進亦吾鄉人所誇羨而樂道者皆無俟余之文以傳而余與先生鬢齡訂交共里閭同師門蘭盟石契垂七十年知先生為尤稔其立朝任官居鄉持家諸大節他人咸嘆為今人所未有而余謂先生直兼古賢之衆美而非偏長一端可得而賅備先

生少負用世才而篤於色養不就徵辟不急仕進則張
齊賢之養母辭州也姿性敏特博極群書不屑為纂組
駢儷之詞而究心朝章國乘典儀制度之因革則劉攽
之博核典制也其治河也相度原隰因地制宜疏塞決
排因時異制凡有興革衆議鼎沸大府必資先生一言
為論定則賈逵之治豫薛弔之治兗也勘災拯溺躬歷
村墟起溝壑而登衽席上下西江前後全活民命幾百
萬則李皋之擅發倉富弼之設官廩也篤友誼急患難
解衣推食雖至空囊垂橐而有所不悔直陳利害條達
民隱知無不言言無不盡雖至撓衆怒忤上官而有所

不懼則魯肅之指困米劉安世之顏色不動也齒德冠
鄉先生上留心桑梓見義必為無唯阿無委謝清風兩
袖不積寸土而胸懷灑落有餘歡則何充之正色不阿
李日知之不治產業也在昔人一端著美史冊艷稱先
生一身兼有古賢之長噫寧非一代偉人歟迄于今皓
首龐眉年開九袞鸞翔鶴翥望若神仙令子次典復乞
假以獻綵觴孫曾繞膝三洲士大夫鞠登祝嘏踵接屨
滿咸嘖嘖稱盛事較之裴令公之居綠野司馬文正公
之遊洛社毋多讓焉他日登百齡之上壽追松喬之盛
軌

恩隆憲乞

聖詔褒綸圖繪儀型傳天下予雖不敏尚當執筆敬述
其盛也

英夢堂司寇七十壽序

星輝南極，筭壽紀黃髮之臣。月朗西曹，燕喜歌白雲之署。繡五紋於麟服，綈幕生春。開八秩于鴈班，丹衷捧日。蓋器儲公輔，群瞻平格之冠裳。而圖猷岡陵，欣祝艾昌。于槐棘唯我大司寇，望叶斗台身，依日月華門，列戟家傳。治譜之編，蕊榜蜚聲。士誦經箱之藝，初鳳儀于淮渚。風靜黥波，繼鴻漸于津門。瀾回鯁壑，勇衣承珮，宣防奏績于桑乾。雞舌香詔，畫永導于蘭省。辭維屏於江左，俞允是嘉。貳治賦于地卿。

溫綸特賁裕九府，泉源之積湛。露宵零，籌兩川飛輓之。

需農星夜耀允矣卿材之望用邀

帝簡之隆爰長秋官晉司憲部白龍弼教八成昭欽恤
之慈丹管引經五聽協咸中之慶仁心仁問本數十年
讀書養氣之功有要有倫立十八司執法平情之準惟
大元臣非常之品受

聖天子特達之知既司徒司寇之兼資更持節持衡之
屢昇甘泉入對老臣造膝以抒忱溫室傳宣

聖主引年而錫福珊鞭頊轡玉珂鳴

朶殿之旁錦帙陳書綵袖侍

經筵之側百家考異遺書讎石室之藏三輔搜奇古蹟

網金臺之舊

詔下秋風灑水綵樞要以留京詩聯春雨銅樓侍承華
於儲案禁軍統領九門令肅如山少府總持三院官清
似水回翔禁闥溫樹無言出入承明闕門必式蓋雲龍
際會上慰

九重毗倚之忱而星鳳攀依下垂百爾官方之範仰歷
懷之若谷藏胸之寶鏡高懸聽決事之如流入手而亂
絲皆理蘇玉局文章一代海嶠傳抄白太傅風月千篇
雞林爭購往讀浣花之集想見萬間庀士之懷近登吐
哺之堂親承一飯憐才之意一陽初復會逢建子佳辰

十賚徵謨欣遇生申令節經腴道味咏魏公老圃黃花
孝緒忠規見謝傳庭階玉樹葵等分司秋典同坐春風
睹若木之華輝生熾火仰喬柯之庇蔭逮纖株敬偕二
三子以敷詞願指八千秋而介祉調太平之玉燭三階
祥現卿雲竚燮理于金甌八伯歌傳紺雪

李滋園壽序

秋深南國晴蒸淮浦之波宴敞東瀛彩映瑤池之樹萬
戶之冠裳麗日鸞笙競奏鈞天一城之襟帶如雲鳬舄
榮留福地榮戟接蓬山紫氣人間之卿月初圓醇醪醉
海曲蒼生天上之流霞正熟恭惟族望濟南名高斗北
當年宰相早占紫芽之緣此日仙人原是青蓮之裔望
三垣而待陟系鵲烏衣邁十部以先馳轂重振赤舄爾其
幼稱岐嶷淨冰雪於聰明長擅雕華負霞雲之意氣借
仙梭之五色組詞艷雲錦之裳奪玉斧于三宵琢句麗
月華之彩兼以機雲善賦屋接東西咸籍工吟道分南

北春入謝郎之夢草綠池塘月明姜氏之衾燈青斗帳
聚西園之冠蓋追陪而妙句齊裁開北海之尊罍倡和
之名篇迭奏于是背錦囊於驢背別空翠於家園咏珊
管之鼠鬚踏軟紅于京雒新鶯欲語春遊紫禁城遣寶
馬頻嘶夜踏黃金臺下吟對風檐之棘文成已冠曲臺
行攀月殿之花名出竟魁蕊榜心疑子固同時竟得眉
山神助仲文到處爭歌湘瑟由是群空冀北入

鳳閣以瞻雲春到江南奉

鸞書而捧檄南轅北轍行臺之倚重佈便殷東抹西塗大
尹之風流獨擅維時潭臨玉女遙分掌郡之權宅近銅

官出領叅軍之任贊羔羊於退食化助雙旌凝燕寢之
清香功襄五袴千羣竹馬口碑猶勒毘陵五日熊羆惠
澤常留江渚且夫雲開芒碭彭城之形勢猶雄地控黃
淮下相之荒涼備劇歌風臺上空傳激烈之遺喜雨亭
邉誰繼循良之治況乎蠡蠕出地四郊之蝥蟥初灾股
翼彌天萬井之杭稔殆盡流亡滿目禱田祖以何靈捕
獲勞心歎宰官之無術而先生從容畫策慷慨救時遂
使鵲報年登蝗隨草偃人歌穗畝錄香十里黃雲犬吠
花村笠戴三更白露固不徒料事則機宜洞照藏胸之
寶鏡高懸治勞而敏決如流入手之亂絲皆理已也既

而琴裝霍擔遙泣瓢城月舫風帆榮遷鹽漬花間觀稼
泯凋瘵之窮檐竹外鳴弦滌煩苛之密網爾時黃流南
瀉家家居雁汭鷗波淮水東奔處處盡魚莊蟹舍稻梁
梗泛客無飯霍之糧奈桷波沉人散嗷鴻之野先生則
低眉心苦援手情殷開汲黯之倉寧須奉詔散壽昌之
社豈為沽名積灾牒如牛毛篝火而三更待判催行裝
於鷁首褰裳則半載分馳每圖易以思艱或調甘而劑
苦乃使黃童白叟免患溝渠綠野青疇無嘆滄海而且
讀法於杏花村落盡變淳風推恩於春草園扉咸稱樂
土蓋澄清攬轡邑人早戴神君而嘯咏操弦里巷爭迎

生佛矣爾乃銀蟾煥彩借玉尺以量才丹桂飄香滌水
衡而取士溶溶藻鑑月朗秋旻濯濯瓊枝霜清鎖院施
三條之官燭心憐螢案單寒念兩道之風簷賦出鴉音
泮水所以西風颯爽爭吟珠玉之章南國英多盡入珊
瑚之網也若夫衙齋清閑雅愛圖書官閣蕭閑性耽翰
墨邦江烟暖丹青寫出書殺海國花明紅紫圖成畫稿
迨夫秋暗蕉陰紙閣風搖嫩綠

重簾捲映簫聲出白玉樓中古研摩挲墨彩煎碧紗
慙裏舞棗歌扇使君之按拍偏嚴檀板金尊賓從之飛
觴莫禁席上之杯呈犀首傾十榼以奚辭篋中之衣典

鸛裴醉三升而自若東窓紅日盼桃葉以吟詩南浦綠
波喚柳枝而度曲君真仙吏已擅裁花製錦之才我愛
詞人更兼弄水看花之興雙屐踏靈岩之嶺袖帶烟霞
一筇登海湧之山衣沾嵐翠小句咏十三樓上唱遍玲
瓏新詞填廿四橋頭鞭敲款段溪尋九曲帆迴水面之
風洞訪三台醉踏峯頭之月此固雅人之深致無非名
士之風流也適者嶺楓紅映籬菊黃鋪當風澄蓉渚之
秋正岳降芝庭之日指南山而祝嘏有輕裘緩帶之賓
隣東海以添籌皆種柳哦松之彥壁上張錦屏十二瓊
筵聽長樂之歌堂前集珠履三千金鼎晉延齡之酒某

久從馬隊敬仰龍門況有豚兒叨陪鯉對誼聯桑梓戴
樾蔭以難名祝獻岡陵指松喬而為壽竚見印床香霑
循聲上紀御屏遙知琴閣祥多壽域長開花縣請浮大
白遙觴南極之星試喚小紅為唱西池之曲

陳制軍太夫人壽序

桐生應序長羸符並翼之祥蕭渥延

恩開袞肇承禧之頌映珠躔于寶婺色朗三霄衍瓊景
於貞曦暄迴九莖華堂戲綵瑤光燭江漢之墟瑞錄凝
徽琬牒邁郝鍾之譽締新嫿於蘿葛習知福德無雙綿
介祉於蘋蘩永祝春秋不老採輿謳而志媿侑仙竿以
臚床惟太夫人生而有文動必以禮拈毫能賦魏著作
之遺宗鏘玉知恭齊王孫之貴族識星階之紫氣入門
而姑布先驚仰雪榭之清標閉閣而封胡競咏雞鳴問
寢服筭教以無違鳳縵臨窻抗針神而獨絕旋乃于歸

右姓作嬪華門翠幙牽絲採二南之芳苕微枝照路綬
九實之天桃時則文肅公西序橫經東山築舍公孫讀
易未起菑川長源賦詩猶潛嵩嶽屬藿鹽之自給實井
臼之親操太夫人乃挽鹿偕歸弋鳧交儆褰綸夕沆溫
愉登石奮之門柳縱晨興曳勉奉梁鴻之案劑羹湯而
洗手食性都諳搔痛癢而承顏沉疴立起拔釵沽醕禮
嘉賓而櫟金無穀輟珥分奩撫弱息而裝蘆泯念既而
文肅公賜名蕊榜蓮羽瀛洲召郤詵于東堂
特擢一枝之桂策匡衡于左陞平躋九列之槐

帝眷股肱陸敬輿集題翰苑人瞻柱石李贊皇官到平

章仗牙毒縣以宣猷封圻澤普擁旌麾而按部嶺嶠風清
時維警戒之紘緹克佐勤勞之衡石玳瑁協度內無出
相之言魚菽明度家有潔遠之享助周諸侯之雅化不
伐條枚嗣魯內子之清風毋停機杼轉八州而作耆縞
綦仍淡泊之懷拜三命而滋恭珣簪絕之色況復

仁心為質照幽室以生光好義能施拯涸津而蒙庇萬
金揮盡糜脯興鼓腹之謳千鍾招來漆炬安薶融之壤
粟泛舟而屢績癸庚咸樂於更生緡倒篋而無遺內外
每資於舉火雲慈徧覆曾聞東海之已臺河潤均沾未
數博陵之李庫洵列女傳所罕覩為大丈夫所難能此

所以譽滿中閭行尤超于三古而慶貽奕禩活何止于
千人者也洎乎華蓋峰頽歌中宵之相杵靈箕星實感
辭闕之封章太夫人則髻髻銜辛綰車奏引斧堂崇庫
亟修驃騎之塋磬管低昂悉罷挽郎之唱必誠必慎鄉
閭由是而觀成盡志盡宜邦俗因之而知禮于是王家
七葉早亢烏衣庾氏諸郎齊連青幕撫門開之喬木競
認三槐眇檠戟之高閣常容駟馬則有玉亭中丞升華
任子擢最樞庭熊軾麟符二千石專城之寄虬旌虎竹
四十旬露冕之榮殿南服以開藩

鸞書疊寶屏上流而作鎮雀舫仍移更看無佩之牙璋

樓雄鼓角爭羨還鄉之玉節軍旆錦衣矧乃叔季聯翩
交驥衢路孫魯岐嶷各授羸經乘驄馬以南行五嶺懾
勇冠之氣引鳳凰而西下夾河間桐軫之風列鼎重裯
會食幾盈于千指鳴珂承蓋籠坊寧僅于十輪簪紱方
來若張氏之興河北衣冠相繼如韋侯之有元成而太
夫人敬德彌勤勞謙益著家規井井不忘居室之勛心
庭誥諄諄但勵守官之恪志翼板輿以雁侍陶士行之
聞教親聆刻嘉石以螭翔曹大家之女箴復覩是宜
國恩烏奕常詢八座之起居而家慶霞臻益裕千秋之
壽愷者矣茲者華齡方晉茂祉告增在中丞輯瑞之時

正太母稱觴之歲荷親咨而動色教忠知出于庭闈爰
曲體夫承歡錫寵倍隆于典物鸞停鵲峙

九重之璇榜垂芒日麗星輝一握之芝華珥瑞鏤旗檀
之好相寶鬘莊嚴襲雲錦之珍函豐綸稠疊凡此蘭陔
拜慶皆奉揚

天子之庥光從知蓬島添籌寶克脩女宗之全福信人
天所希有宜謳咏之攸同象服翟衣奉尊章於坐側瑤
環瑜珥羅秀穎於階前民吏騰懽走賀則百城負弩公
卿頌德緘音則千里承筐猥序託於葭莩先詞陳于糠
粃惟遙企西池勝地長生斟九醞之漿庶同邀南嶽羣

仙高唱和八瑯之曲

李鑒泉壽序

蓋聞詩歌綠竹士林瞻圭璧之儀酒釀黃花耆舊著松筠之操蟠靈根于仙李世傳紫府名宗挹嵐黛于大房家近翠微峯頂醇風圖景慶久忘軒紱之華雅望耀巖阿獨著神仙之表鑒泉先生族重畿南名高斗北華年談道早占紫芋之緣綺歲裁詩遠嗣青蓮之響渾涵雅量淨冰雪之聰明磊落高懷負雲霞之意氣問安視燠寢門每聽鳴雞陳旨懷甘澆雀時聞躍鯉夢春池之草綠堦前枝茂荆花燃夜閣之燈青砌下芳榮帶草洛下之機雲並美辭列東西陳留則咸籍工吟道聯南北惟

楷模望重藏霧豹於南山堂構任專慕冥鴻于北渚謝
青雲之事業勉愛弟以分有著綠野之經綸為公宗所
矜式誠孚然諾人遵季布之金性洽交遊家置鄭庄之
驛解紛排難粉榆爭識仲連立懦廉頑桑梓咸推樓護
關心松檟時推錫類之情蒿目烟放每切修防之念溝
隍可憫解推倍急於窮途城府都忘慷慨彌彰其大度
於是群季則駢留接軫駿譽同馳次公則鶚鷺翔霄鳳
毛秀出簪毫瑣闥風清紅藥之階僊直禁園光映紫薇
之座

龍綸三錫傳佳話於長安鳩杖雙扶頌齊眉之盛事傳

經課藝勉諸子以琳瑯索笑含飴分文孫之梨栗而且
襟懷灑落有氣吞雲夢之思丰骨峻嶒存壁立嵩衡之
槩一塵卜宅容蜨夢以徜徉雙漿浮家聽魚歌之唱答
雨中雙屐行吟八渡清波花外一筇步訪三關重鎮此
誠雅人之深致抑亦晚歲之風流也茲值霜明楓嶺之
秋適逢嶽降芝庭之日指南山而祝嘏皆雕龍綉虎之
賓積東海以添籌有紺雪青霞之賦耳熟龍門心欽駿
望頻年紫陌早知小謝才名此日黃圖共仰中郎碩望
問茱萸之酒熱鹿車扶七寶香輪撫松鬣之鱗蒼龍爪
飽三清瑞露

高封翁雙壽序

益峰蘊秀表人瑞於東山渤海徵祥樹女宗于南國雙
歌疊奏綺筵賡琴瑟之詩錦悅桑弧珂里頌門闌之慶
攀鹿車而攜手停輿贈益壽之花舉鴻案以齊眉洗聳
奉延齡之醞翻當階之紅藥春風藹高士廬中采繞砌
之金英秋曜麗瑤姬館外恭惟高太翁可亭先生青城
詞客紫府耆英髫年修執玉之容壯歲具餐霞之志綺
齡綴筆溫溫冬日之和餘事為詩藹藹春雲之態訪粉
榆之古社家隣銀笈城邊栽蘿薜于衡門宅近宴花樓
下紅深綠暗種徧西園絳燭青鐙課嚴東廨評書讀畫

風流傳海岳之歌愛潔耽奇瀟洒有雲林之癖經鋤帶
草永懷賢士于峰陰酒釀梅花願醉老人于星渚恭惟
高太母阮太君玉洞仙家人饒慧業青雲世族室有賜
書溯邇下之才華世傳風雅緬竹林之高致人善清言
早嫺牖下之風曾諳賦菊夙擅閨中之秀遂叶吹簫人
號鍼神巧備織紵之樣衆推蕙質爭傳綖緡之方雞聞
四野杼軋軋而先鳴蛩語三更緯蕭蕭而並絡西池宴
啓分張金粟之園南岳書傳共發琅毫之管夫其綵繩
繫幔人嘆皆佳玉鏡催粧客言兩美袁公抱道偕馬季
媛而益彰鮑氏懷芳得桓少君而彌重蓋闈侍養萊衣

馴庭外慈烏蘭閣祈年裙布畏林中孝笋曲譜塤篪之
調春藹荆花情敦娣姒之歡風和拓館縹緗插案映夜
雪以長吟刀尺盈函感秋風而並響人訝五行並下絳
關則左癖書愚誰能十指忘勞翠袖則牽蘿補屋慷慨
下南州之榻全資黽勉之同心風流開北海之尊雅藉
咄嗟之立辦門前蠻榼每停揚子之車座上蘭盟盡入
山妻之鑑他若三宗式化六黨觀型阿大中郎縹緗飽
德諸姑伯姊佩悅貽歡澤及池中鄭產之魚真得所情
深幕上謝娘之燕亦懷恩是以鳳羽高竊瑞呈丹穴孫
枝茂起祥兆金鈴睹錦繡之成堆才稱合璧望虹霓而

吐穎姿比連珠適值丁年齊周甲筭東來紫氣函關瑞
應西池北斗瑤光寶婺輝連南極弧懸則春深錦幔桂
吐滿輪悅設而爽荐金風蕓餘五葉余誼屬通家情敦
世講久從馬隊敬仰龍門昔也東觀裁詩因難兄而悉
班姬之學比者西湖倡教得令子而悉名父之風霍錦
魚綾競寫長生之頌瓊箱翠軸爭投多福之謠萬舞齊
陳請看五百年花五百年實雙歌並奏願祝八千歲春
八千歲秋

陳封翁壽序

星懸南極小山貯鴻寶之篇波暖東瀛丹竈紀鉢池之
蹟從來紫府歸孝友之名家自昔黃眉聚耆英之古社
捧鸞書於畫省綸綍霞明歌燕喜於錦堂簪裾雲集宗
姪拙修農部秀毓天都派承淮渚太邱望族門庭獨富
縹緗文範家敬弓冶常留矩矱渾涵雅量萬頃波澄磊
落高懷千尋岳立兼慈明之朗潤價比南金示元禮之
楷模名尊北斗方當早歲淨冰雪之聰明比及強年負
雲霞之意氣洛下之機雲擅譽屋列東西陳留則咸籍
工吟道分南北焚香掃地招邀二仲清談問竹探梅領

略四時佳興解紛排難扮榆爭識魯連立懦廉頑桑梓
咸推樓護料事則機宜洞照藏胸寶鏡長明治禁而敏
決如流入手亂絲皆理春池草綠堦前荆並生花夜閣
燈青砌下蘭皆茁蕊聚天倫而較藝恩重竹林挽流俗
之頽波交親蘭臭于是桂宮香馥杏苑花紅宣偉績於
司徒振文風于黌序一家羣季鷗鷺翔霄三榜巍科驊
駟接軫祥徵宅相嘉休早卜于陽元秀啟後來萬望還
符于范甯瑞生丹穴譽比鳳毛秀出青雲人誇犀角溝
隍可憫解推倍急于窮途城府都忘慷慨彌彰其大度
琴堂風靜連看猶子之攀花泮壁波澄快覩諸孫之采

藻龍綸焜耀傳佳話千農曹霍鬢婆娑仰清風千粉署
雨中雙屐尋幽過趙嘏樓邊花外一筇買醉到杜康橋
下固雅人之深致亦晚歲之風流也邇者榴霞紅蕩梅
雨黃敷當風澄蓮渚之時正岳降芝庭之日指南山而
祝嘏皆雕龍繡虎之詞積東海以添籌有紺雪青霞之
賦謀譜屬一門契敦三世昔年虎榜早欽小謝之才名
頻歲鱗書更仰中郎之碩望知之最悉偕二三子以進
言詞不崇詠指八千秋而為壽遙知薰風吹幕徵詩張
五岳之圖鉉者湛露開尊捧觴盡十洲之客

周母李太宜人八十壽序

自昔史傳所載女宗表著者其事不越盛湘組紉之常而教能行于戚黨其聞見不逾閨闥帷房娣姒保姆之所談說而名能重於當世士大夫非獨慈祥勤儉得性固殊而家法醞釀于前哲嗣克肖于後俾閭閻懿蓋彰矧輦轂之下醴化祥氛感被尤捷者哉大興周氏為日下望族贈公裕菴先生束修自好一生多善行令子棟材尺步而繩趨間叩其所學蓋自失怙後從師考業皆太宜人督課維勤比年以來棟材著聲西曹殫心職守公私進反悉秉母教噫非是母不生是子不並信歟慨自

內則不修女士者流不復以講禮習儀為急徒徇于浮
趨縻俗誇多而門靡門戶漸以衰風尚亦漸以薄是以
宜家翼後矩範渺焉無聞今觀太宜人而知凝禧受福
有由來也綜厥生平在室事親以孝聞于歸事姑得歡
心恃疾維謹焚香額天感於神明贈公中年棄舉子業
多遠遊太宜人措拄門庭日益昌熾幼習縫紉至老不
易目不睹華飾身不習惰容門無祿賓家無戲具生平
多吉祥善事寬恕有容每因事導人以善骨肉姻婭情
禮咸周樂施市義未菽櫬具之惠歲及於鄉閭而自奉
節約雖浣濯必親雖小鮮不殺數十年來有如一曰其

訓子也棟材稍長嚮學言省課程勞不以愛弛嚴不以
慈廢親刀砧以佐膏火補弟子員五載而贈公即世門
内外事悉一身肩之俾棟材鍵戶潛心所業及其策名
于朝職司刑法則勉以明慎將事而以競浮榮逐聲利
為戒時時提策之如初夫美官華寵固恒情所日夜望
其子碩豪髮不以動于中始終以立身行義為勗勉是
誠母儀之軌範而與古人圖箴紀贊所稱述者輝映乎
後先今年九月舉八十觴青鬢丹顏雙矚炯炯孫曾統
膝競茁瑤瑜

鸞誥寵褒綵衣獻壽夫非積慶所鍾而難老無疆之驗

乎夫王化起于閨門京師實為首善勤儉慈祥之德即
凝禧受福之基子謹質言以介賓筵而風勸之義存焉
故無取于世俗稱觥獻履之華詞也

荆恭人六十壽序

予與觀察荆五峯先生部民也而寔性命之交也通門舊誼訂交髫年不為名場聲氣所漸染及觀察由翰林改官江南予一過鎮洋再過沛縣課其弟及子姪並以道義相砥礪觀察古循良吏治民事如家事轉置家事於不問而內署調劑綜核之宜井井秩秩知為衮恭人內助之力久之益悉閭閻懋著婦職母儀粹然純備居今而求內助之賢殆于恭人屈第一指焉夫自先王之教不行而閨門無保傳其言動服御日趨於浮薄而無法度之遵其氣習風聲起于市井賈販而漸染於學士

大夫之族間以內凌囂佚蕩官室尤甚予每舉恭人往
事為教家者勸輒為三嘆而不置也今年九月為恭人
六十誕辰令子愛冬乞一言以侑觴京師名公卿麻列
而索迂朽末僚之詞其諸異乎世俗之言者歟恭人徽
嫩著於家型于鄉聞于官聯與誦匪覲綏可盡而予特
記其逸事一二以備賓筵之頌觀察少為諸生暨舉孝
廉貧無立錫授徒遠出恭人仰事承顏竭十指力營甘
旨婉愉和順曲得其歡而粗糲自奉有田家所不堪者
一門內外雖畚鍤炊舂之後皆一身摒擋歷二十年無
倦色及隨宦大江南北俗所稱富麗之區而恭人鉛華

不御悉守素風迄于今疊受龍章屢移劇郡他人艷羨
不置者而恭人視之泊如也觀察之姪 方六齡隨

予讀書沛邑恭人朝夕護持衣履皆出手製每日課早
完則欣然色喜或所誦未熟後堂炳燭子夜猶聞唧唔
聲觀察側室 育子而母殞恭人生子方一年輟其乳
以乳幼子或勸催民婦乳之恭人曰吾子女三人氏僅
一子他人視之恐不謹吾心有不能已者及長教督無
殊已出噫是誠難能也已吾聞仁為壽之本德者福之
基勤儉慈祥乃積德累仁功效之所見端恭人佐觀察
閩政克修內而承家睦族外而愛民恤灾足為彤史光

者殆美不勝書予特掇是瑣瑣者若不足尊揚懿範而
于閑家厚俗之道竊有小補蓋寓諷勸之義焉愛冬喜
直言不尚時俗華誕之詞以此佐蘭幃一觴或亦無戾
于觀察道義相勗之初願也夫

金太恭人壽序

予自卽

恩北闕轉漕南屏頻年聽楚戶之歌暇日采淮風之秀
煌煌瞽宗之側別構精廬峒峒雉堞之旁重營講舍乃
有西清才子懸玉尺于蕭齋東辟仙人設文旌于馬帳
啓蘇湖之教澤香生碧沼之芹泣淮海之名邦芳擷小
山之桂經持家法茅盡化而為荃望樹人師璞盡雕之
成璧爰于裁課之餘用述稱觥之慶花朝節屆人頌攀
輿錦悅筵張客來載酒采蕪詞而介祉祝護壽以承歡
夫其鳴環綺歲授伏勝之遺經頌菊髣齡窺班姬之古

籍卜鳳而五絲牽就珠繫羅襦求凰而百兩迎將花明
油壁門多列戟入巷而轍卧朱輪家有賜書插架則載
標細帙琴瑟靜好常吟弋雁之詩尊竿載陳更肅齊眉
之業奉慈顏之燕喜鯉躍銀瓶佐雅志以鸞鶩螢囊綈
几於時中憲公鯤運北溟鳳翔南國雙麟剖玉寵紫綬
以分符兩鹿頒金張朱橘而典郡哉花拔薤事不讓夫
古賢渡虎懸魚美復徵于興誦況前者淮壖卑濕魯理
素琴楚甸沮洳共瞻赤烏當年耳熟廉叔來暮之謠此
日口碑何武去思之感而太母擁翟榆而佐治膺象服
以雍容賜袋垂魚課機終于五夜咨寒問暑躬瀚濯于

四時尤有異者請具陳焉歲當壬戌之秋地接山旰之
界天吳震撼邁兩瀆之橫流地軸傾頽捲千村于濁浪
金隄虹偃傷心烟水彌空土堙蛙生極目叱離載道中
憲公既為民請

命佇雨露于

絲綸亟戒嚴裝聚芻茭而鍾菴而太母則低眉心苦援
手情殷不惜傾囊頻聞搜篋和丸劑藥分潤于鷗波雁
汊之墟疊絮兜綿挾纊遍鵠面鳩形之侶拔金釵而畫
粥煮糜每用親嘗等玉粒於量沙數米全資聞督食無
兼味堂餐憫婦子之饑座撤重茵盡寢軫單寒之因此

則黃童白叟胥沐使君再造之恩粒粟寸絲均沾太母
重生之惠枚生宅畔所由較列郡而倍切瞻依國士城
邊不禁聚諸生而同申頌禱蓋母儀咸備雖累幅難繪
丹青而多士陳詞即往事可知梗概某叨世講誼切通
門未獲偕范式登堂恰喜共王陽在位賓筵授簡不假
班香宋艷之詞廷實稱觴止攜席帽青衫之士此日生
徒列侍堦前共咏羣仙他時冠帔呈圖陛下聞呼老福

陳文肅公夫人七十壽序

家隣南嶽金護映天姥之峯錄注東華琬牒冊瑤妃之
誥

朶殿錫褒綸玉軸煥五色之鸞迴相門留補袞靈絃繡
九皋之象服萬家生佛衢歌遍江漢瀟湘八座起居萊
綵拜夔龍稷禹蕭濃杞湛

恩延鈴閣祥暉榴葩桐華香馥節堂賓席恭惟師母上
谷名宗 右族禮嫻玉藻德冠璇臺習內則于初髻
入門而咸欽良媛奉箴言于毀齒望氣而知有貴人遂
迓魚軒爰諧鳳卜弋鳧交儆春笛親綵挽鹿偕歸秋鐙

佐讀酒漿是議入厨而食性都諳擲縱視安隔幔而瘡
痾默喻衣經醉濯疊紫鳳于女箱案積脯糜剉青芻于
客廐迨吾夫子文肅公幟拔兩湖名魁三榜直槐廳而
視草紅燭移蓮入芸署以抽書青藜燃杖薰班摘宋宮
中誦才子之詩宴鎬遊汾闕下傳翰林之製維時三吾
路杳未遑秣馬而迎而二老飴舍端賴持門之健師母
則園拙孝笋井汲神魚膳扣成丸機閤斷杼婦兼子職
寢門自戲斑衣母抗師顏家塾親傳青簡頻繁蕙藻湘
綺釜于雞晨箴泉麻飼箔筐于蠶月及吾夫子揮毫
而三賦爭傳授簡而

九重稱善貳演綸于北省佐啟事于東銓開府江淮鄆
膏渥被覃津閭嶠泰谷生春擢長夏官命專邦政冠六
卿而官九品翔二府而陟三台機贊樞庭造膝親承密
勿筆宣

皇澤代言誕布殊方相司馬而童叟騰懽倚冠公則鎖
鑰是寄擁絳騶于三輔之近移蓮幕于五嶺而遙師母
則內政克勦執事有恪補七襄之錦段佐斧藻于絲綸
潔五夜之盤飧助調羹于鼎鼐沙隄月靜心勞戒旦之
鯨鐘黃閣風清夢切書思之象笏勉承清白飭禁時粧
每念擅青寒猶被絮簪荆裳布曾聞浦已還珠荔紫蕉

黃羣頌舟空載石乃自台星南陞大鳥西來奠輟溫明
謚錫碑篆師母晨壘不浣夜泣無聲躬葺芥堂客拜祁
連之塚手栽墓栢人指相公之林築室三年敬每形于
榛栗分金六黨惠遍洽于粉榆于時謝家子弟人擅雕
華劉氏諸郎才皆脫穎承金甌之舊學稱喬木之世臣
則我玉峯大中丞夙負非常之望仰邀

特達之知蘭省青纁入著鴻樞之譽彤襜玉節出宣虎
竹之威界吳會以開藩控荆襄而東鉞鎮撫則蒼茫三
楚提衡岳牧之尊保釐則南北重湖指顧江山之壯樓
船組練兼雀印于莎廳蒨蒨油幢開戟轅于梓里次公

繡幃仁風扇香島花田羣秀腰章令譽著黃圖赤縣葩
連五樹完山鳥盡鵲驚笏植一床赤水珠皆璵璠師母
重泣潘輿宏開韋幔鐘鳴鼎食減堂飧而憫婦子之饑
燕寢清香撤重茵而挾車寒之續寸縑不棄扶危則擲
若泥沙一介必嚴濟困而揮同土塊益母儀聖善雖累
幅而莫罄形容而門下賡揚憶往事而略陳梗概茲值
中丞之述職陳情復蒙

聖主之殊崇錫類捧

奎章之璀璨光燭檐牙迎寶相之莊嚴歡生如意慈珮
與荷纓並繫豐貂並文綺交陳回絳節以稱觥開旌門

而設幌雲連紫蓋三花獻芝草之稜江抱黃樓五月落
梅花之笛拜母集三千之履觥酌龍頭留賓置七十之
帷笙吹鳳嘴某等幸出龍門曾陪鯉對當年京雒聞經
訓于紗帷此日湖湘瞻婺光于雲漢願指八千春而為
壽未獲偕范式登堂用偕二三子以操觚竊喜共王陽
在位六曲屏徵十賚錦箋同頌宣文卅年壽紀百齡玉
陛聽呼老福

王司馬太夫人七十壽序

秋高南國晴蒸河渚之霞彩絢西池香泛瑤臺之樹采
黃花於鉢嶺映慈竹以生香挹紫氣于丹臺擷靈芝而
獻瑞雍容象服允協德於山河蹀躞龍媒正蜚英于衢
陌萬戶之謳歌沸月雙璇競奏鈞天三洲之冠蓋如雲
五馬榮留福地夫其鍾祥元吉秉德肅雍鳴環綺歲曾
傳伏勝之遺經頌菊唇齡爰續班姬之古籍卜鳳而五
絲牽就珠繫羅襦求凰而百兩迎來花明油壁時則太
翁先生青雲接第列戶外之朱輪錦里鳴珂立檐前之
畫戟播聲華於粉署望重斗山留楷範于人倫群推月

旦而太夫人綢繆內政獨荷辛勤黽勉堂闈佐成清白
架上之風蠶自浴春箔頻繅房中之刀尺齊裁秋鐙獨
對雞鳴紫陌留心問待漏之車鯉躍銀塘洗手調入廚
之膳無何琴摧蜀國忍彈別鵠之音鏡掩秦臺已罷孤
鸞之舞枝銜精衛永貞填海之心石鍊媧皇獨具補天
之手以健婦而持門戶竟同創業之劉殷為慈母而兼
嚴君不亞遺經之韋相在太夫人以一木而支大廈操比
柏舟而我公祖以一髮而繫千鈞幼能懷橘誠孝然諸
人詩季布之金性喜交遊家置鄭庄之驛擔登記室承
歡謀負米之供捧檄河干養志著皋蘭之咏始則孤城

百雉綰符施疏鑿之功繼而楚甸三洲擁綬著澄清之績欣逢

巡狩遂薦剡章名紀丹屏頻邀殊擢仁風惠露時聞素浦之歌繡幃朱輪常慰潘興之養而太夫人頻厲封鯨厭間行馬勉居官以清白默養靈田期報

國以忠純自成樂地祥刑鞠獄恒隔座以忝情拯溺救焚每披衣而待旦蓋和熊畫荻高堂之集福方長而繡佛長齋老景之娛懷倍暢加以羊車竹馬翩翹蘭桂之姿犀角烏衣緇緝庭階之秀歲時拜慶官齋之笑語常溫宵旦承歡兩代之簪紳侍側天書特貴魚軒映新綵

而增華老福齊徵鶴算積仙籌而並永茲際奠圃呈芳
之日正值萱闈設悅之辰華堂祝嘏菜衣煥日月之光
綺席引年畫錦集冠裳之盛按玉筍于指下四座皆春
燒絳蠟於盤中三更若晝某久從馬隊敬仰龍門撫錦
縣之棠猶懷舊德望金隄之柳益慕新猷爰拜母而登
堂爭歌詩而侑爵從知印床香霽循聲上紀綸音子舍
溫生壽域常開官閣

王母陳宜人壽序

春深磐潤晴披益壽之圖嵐蔚蓮峯彩綯長生之悅采
碧桃于古峪依慈竹以生香擷紅藥于綸扉映金萱而
獻瑞雍容象服允協德于山河稠疊

鸞書荷揚徽于

綸綍珂里之謳歌沸月慶溢簪紳天街之冠蓋如雲榮
生槐棘夫其秉德肅雍鍾祥元吉鳴鏐綺歲幼傳伏勝
之遺經頌菊芳齡長讀班姬之古籍卜鳳而五絲牽就
譽隆文範之家乘鸞則百兩迎將媿著琅玕之室弋鳬
交傲春箔晨綵挽鹿偕歸秋鎗夜課園拙孝筍入厨而

一
卷之二
嗜好多諳井躍神魚養志則形神默喻時則我年伯雲
霞意氣推藝苑之孟嘗綦縞流連仰詞壇之季布名魁
蕊榜驚才擅鳴鳳之稱教洽津門雅操著瘦羊之譽銓
材擢秀茅且化而為荃懷瑾握瑜璞盡雕之成璧比鄭
莊之置驛東溢東皋隨文舉以開尊座依北海我母則
內政克修執事有恪河能分潤添泮水之恩坡岱欲生
雲潤苜盤之甘雨剡青芻于客廐指畫忘勞撲紅綳于
隣牆鮮推弗吝曲叶墳簞之調春靄荆花情敦姊如之
歡風和柘館諸姑伯姊譽不間於人言猶子比兒愛更
殷於已出人稱婦職鮮此姱修我頌母儀尤多令範家

傳綳帙分午夜以程書室有青氈按辰宵而裁課德門
餘慶睹兩劍之凌雲世德重光見雙鏤之耀日于是我
友梅岑桂樹聯攀薇垣獨步簪銀毫而侍直入演

王綸擁墨授以分符出膺民社捧鸞迴之

紫誥侍旁繡于板輿瞻鶴髮之蒼顏杖玉鳩于韋幔花
陰問字勉群季以青雲月夜傳經課諸孫以絳蠟花明
柳暗三春之韶景方妍綉幌錦屏六表之長筵初啓指
南山而祝嘏皆雕龍綉席之賓望東海以添籌有紺雪
青霞之句其交忝通門誼敦宗譜當年蕊榜曾共看花
此日玳筵還同揚解知之最悉偕二三子以進言詞不

宗諛指八千春而為壽紫陌展春風繡幃徵歌張五岳
之圖錦堂流湛露瑤觴捧筆盡十洲之客

祭母舅陳府君文

嗚呼自公之逝音至都門而蔡兄弟之哀日以增者非徒以渭陽之誼離別之感已也別公以來未經十稔每憶丙辰丁巳間蔡等皆在瑤輝讀書于公之家塾者凡四年與中表諸兄弟喁于一室同飲食共几榻暇則隨諸舅氏德業相勸過失相規時伯舅曾餘先生以經師為一鄉之望督課綦嚴而視蔡為尤切每有過差蔡必先陳請于公為解免歷歷如昨日事及先大夫乙丑歸田曾餘先生已先一年歸道山與公朝夕聚首往還綢繆事無公私固不商榷者又二十餘年甲申之秋慘遭

大故公言問關注懇切周至自是凡家事身事悉以任之者又十年己庚之歲蔡兄弟宦途蹭蹬公聞信至廢眠食俾來慰藉不絕嗣是芝補官北地公轉以吾兄弟得聚首一方為之色喜每音問至當開函披讀時如聞馨歎如對几席勉以持身居官之大防諄以急功近名隨俗波靡為切戒故離蹤雖久而箴規訓誡之詞無月無之嗚呼蔡等自失怙恃後有過得聞不致墮行敗名者寔維公之教而今已矣蔡之愚慙不洽于之仕途芝亦惛惛自放將誰為針膏肓起廢疾耶公生平治家以儉課子姪以嚴待友朋無間賢愚皆期其成立于骨肉

姍姍尤誼美而恩明遇桑梓大事主持公道不避勞怨
士林人人交頌之祇今存順沒寧子姓彬彬玉立公誠
坦化無毫髮憾葵等哀慘之餘覩縷難盡惟是愴念疇
昔痛不可裁道里阻長不得撫棺一慟用托至親無文
之義而庾言以志吾之哀無終窮耳靈光未遠尚其鑒
諸